

Održani brojni značajni događaji na Univerzitetu u Sarajevu u periodu od 3. do 7. jula 2017. godine

– Izražene aktivnosti na Univerzitetu u Sarajevu pred nastupajuće godišnje odmore –

Univerzitet u Sarajevu je u periodu od 3. do 7. jula 2017. godine organizirao brojne događaje s ciljem implementacije kvaliteta kao prepoznatljivog faktora uspješnosti.

Prvi događaj koji je obilježio ovu sedmicu bio je seminar pod nazivom „Osiguranje sistema kvaliteta na visokoškolskim institucijama: Primjeri dobre prakse“, organiziran kako bi se Univerzitet u Sarajevu što bolje pripremio za akreditaciju svojih studijskih programa i institucionalnu reakreditaciju koja ga očekuje u bliskoj budućnosti.

Veliku pažnju izazvala je diskusija „O nauci i njenom vrednovanju“ na kojoj je uvodničar bio jedan od najcitiranijih bosanskohercegovačkih naučnika akademik dr. Kemal Hanjalić, profesor emeritus Univerziteta u Sarajevu i Tehničkog univerziteta Delft u Holandiji.

Usljedili su sastanci u okviru izrade studije EUA o istraživačkim kapacitetima u zemljama Zapadnog Balkana, a održan je i okrugli sto „Bibliotečko-informacijske službe i usluge u visokoškolskim bibliotekama kao podrška učenju i učešću studenata s invaliditetom“.

Svečanim činom promocije doktora nauka upriličene u Narodnom pozorištu Sarajevo, Univerzitet u Sarajevu je postao bogatiji za sedamdeset jednu kandidatkinju i kandidata na čast doktora nauka iz oblasti koje pripadaju grupacijama humanističkih, društvenih, medicinskih, prirodno-matematičkih i biotehničkih te tehničkih nauka kao i Grupaciji umjetnosti.

Susret prof. dr. Yousefa S. H. Al-Zalzalaha i rektora prof. dr. Rifata Škrijelja rezultirao je dogovorom o jačanju akademske saradnje između Univerziteta u Kuvajtu i Univerziteta u Sarajevu.

Radna sedmica ispunjena nizom značajnih događaja završena je svečanim uručenjem počasne titule *Ambasador znanja* prof. dr. Rifatu Škrijelju, rektoru Univerziteta u Sarajevu.

Održan seminar „Osiguranje sistema kvaliteta na visokoškolskim institucijama: Primjeri dobre prakse“

4. juli 2017. godine – Seminar pod nazivom „Osiguranje sistema kvaliteta na visokoškolskim institucijama: Primjeri dobre prakse“ je održan u Rektoratu Univerziteta u Sarajevu. U okviru seminara su prof. dr. sc. Jasmina Havranek, direktorica Agencije za znanost i visoko obrazovanje Republike Hrvatske (AZVO), i njene saradnice: dr. sc. Vesna Dodiković-Jurković, Mirjana Gopić, dipl. iur., i mr.

sc. Sandra Bezjak, upoznale prisutne sa izazovima sa kojima su se susretale visokoškolske ustanove u Republici Hrvatskoj prilikom akreditacije studijskih programa



i institucionalne reakreditacije, a u cilju da se na tim iskustvima Univerzitet u Sarajevu što bolje pripremi za akreditaciju svojih studijskih programa i institucionalnu reakreditaciju koja ga očekuje u bliskoj budućnosti.

Na samom početku prof. dr. Rifat Škrijelj, rektor Univerziteta u Sarajevu, otvorio je seminar pozdravnim obraćanjem u kojem je naglasio nastojanja Univerziteta da implementira i unaprijedi sistem osiguranja i upravljanja kvalitetom slijedeći „Standarde i smjernice za obezbjeđivanje kvaliteta u evropskom prostoru visokog obrazovanja“, kroz rad Odbora za upravljanje kvalitetom na Univerzitetu u Sarajevu, Ureda za osiguranje kvaliteta na Univerzitetu, odborâ za osiguranje kvaliteta na organizacionim jedinicama Univerziteta u Sarajevu, ali i kroz rad svakog nastavnika i saradnika na Univerzitetu u Sarajevu, te istakao da je seminar prilika da se, na primjeru dobre prakse, ponesu važna znanja koja će pomoći u obavljanju ozbiljnih zadaća na putu razumijevanja, uspostavljanja i unapređenja kvaliteta u području nauke i visokog obrazovanja.



Nakon pozdravnog govora prof. dr. sc. Jasmina Havranek, direktorica Agencije za znanost i visoko obrazovanje (AZVO), u uvodnom obraćanju upoznala je prisutne sa historijom i nastankom Agencije, te predstavila aktivnosti koje Agencija provodi, međunarodna članstva koja ostvaruje u Evropi i svijetu, kao i saradnju koju imaju u regionu sa drugim akreditacijskim agencijama.

Učesnici seminara su imali priliku čuti sljedeća izlaganja:

- Standardi i smjernice za osiguranje kvalitete – ESG, 2015.: dr. sc. Vesna Dodiković-Jurković, AZVO
- Postupak reakreditacije: Mirjana Gopić, dipl. iur., pomoćnica direktorice AZVO
- Reakreditacija visokoškolskih institucija – provedene aktivnosti i budući planovi, te utjecaj na sistem visokog obrazovanja: mr. sc. Sandra Bezjak, pomoćnica direktorice AZVO
- Vrednovanje studijskih programa u svjetlu Hrvatskog kvalifikacijskog okvira: mr. sc. Sandra Bezjak, pomoćnica direktorice

Diskusija „O nauci i njenom vrednovanju“

5. juli 2017. godine – Ugledni i jedan od najcitiranijih bosanskohercegovačkih naučnika akademik dr. Kemal Hanjalić, profesor emeritus Univerziteta u Sarajevu i Tehničkog univerziteta Delft u Holandiji, bio je uvodničar diskusije pod nazivom „O nauci i njenom vrednovanju“, koja je održana u Rektoratu Univerziteta u Sarajevu.

U ime akademske zajednice Univerziteta u Sarajevu i rektora prof. dr. Rifata Škrijelja prisutne je prigodnim obraćanjem na početku skupa pozdravio prof. dr. Izet Rađo, prorektor za naučnoistraživački/umjetničkoistraživački rad Univerziteta u





Sarajevu, koji je prezentirao aktivnosti menadžmenta Univerziteta u Sarajevu u oblasti NI/UIR-a, kao i odlučnost Univerziteta, na čelu sa rektorom prof. dr. Rifatom Škrijeljom, i svih njegovih tijela na putu daljnjeg razvoja i unapređenja nauke i istraživanja na Univerzitetu u Sarajevu.

Akademik Hanjalić je u svom izlaganju naglasio da su univerziteti generatori i rizničari znanja i inovacija, te predstavio naučnoistraživačku funkciju, obrazovnu funkciju u naučnoistraživačkoj djelatnosti, ekonomsku i društvenu funkciju i kulturno-historijsku funkciju. Akademik Hanjalić je govorio o stanju u oblasti nauke u Bosni i Hercegovini, te o trendovima u nauci i njenom vrednovanju u svijetu, u razvijenim ali i zemljama u razvoju. Date su i preporuke u cilju razvoja nauke i naučnoistraživačkog rada na Univerzitetu u Sarajevu, te preporuke za Bosnu i Hercegovinu, poput inoviranja strukture naučnoistraživačkih organizacija novim modelima, reguliranja sistemskog i dugoročnog obrazovanja naučnog podmlatka, integriranja javnih univerziteta i druge.

Nakon uvodnog izlaganja akademika Hanjalića, uslijedila je razmjena mišljenja o ovoj značajnoj temi, u kojoj je učestvovao rektor Univerziteta u Sarajevu prof. dr. Rifat Škrijelj i članovi menadžmenta Univerziteta, članovi Savjeta za nauku i umjetnost Univerziteta u Sarajevu, prodekani organizacionih jedinica, te nastavnici i saradnici Univerziteta u Sarajevu.

Rektor prof. dr. Rifat Škrijelj se osvrnuo na ključna pitanja o kojima je govorio akademik Hanjalić, te naglasio neophodnost većeg stepena autonomije Univerziteta u Sarajevu.



Za jesen ove godine, rektor Škrijelj je najavio nastavak saradnje i brojne aktivnosti, među kojima i organizaciju okruglog stola koji će biti posvećen pitanju autonomije Univerziteta u Sarajevu.

Istakavši da je nastavna djelatnost kao primarni zadatak na Univerzitetu u Sarajevu trenutno u procesu ozbiljne reforme koja je u nedovoljnoj mjeri usklađena sa realnim potrebama društva, rektor Škrijelj je naveo da od početka mandatnog perioda menadžment Univerziteta poduzima čitav niz koraka kako bi ovaj segment djelatnosti Univerziteta bio unaprijeđen i na taj način popravljen ugled visokog obrazovanja. Kao jednu od aktivnosti koju je naveo rektor Škrijelj je projekat zapošljavanja 200 najboljih studenata kao asistenata, istraživača i stručnjaka na organizacionim jedinicama Univerziteta u Sarajevu, a taj projekat je već upućen Vladi Kantona Sarajevo.

Akademik Kemal Hanjalić je profesor emeritus Univerziteta u Sarajevu i Tehničkog univerziteta Delft u Holandiji i vodeći je naučni autoritet u oblasti matematskog modeliranja turbulencije i transportnih procesa. Rođen je u Sarajevu 1939. godine, gdje je 1964. završio Mašinski fakultet. Magistrirao je na Univerzitetu u Birminghamu, a doktorsku disertaciju iz oblasti mehanike fluida odbranio je na prestižnom *Imperial College of Science and Technology* u Londonu.



Kao redovni profesor predavao je na Univerzitetu Erlangen u Nirnbergu, Tehnološkom univerzitetu Mičigen u Sjedinjenim Američkim Državama, Univerzitetu „La Sapienza“ u Rimu, te kao gostujući predavač na brojnim prestižnim univerzitetima širom svijeta (*Imperial College of Science and Technology* u Londonu, Univerzitet u Kembridžu, Univerzitet u Kaliforniji, Univerzitet u Kyotu, Univerzitet u Singapuru i dr.)

Akademik Hanjalić je u profesionalnoj karijeri obavljao i više različitih stručnih i društvenih funkcija: bio je direktor Instituta za procesnu tehniku, dekan Mašinskog fakulteta, gradonačelnik Sarajeva, ministar za nauku i tehnološki razvoj u republičkoj Vladi, te delegat Jugoslavije u Komitetu za životnu sredinu pri OECD-u u Parizu.

Objavio je više od 350 autorskih studija, te preko 200 radova koji su u naučno indeksiranim časopisima citirani preko 4000 puta.

Profesor Hanjalić je redovni član Akademije nauka i umjetnosti Bosne i Hercegovine, Kraljevske akademije za tehničke nauke Velike Britanije, član niza naučnih i stručnih udruženja u SAD-u, Turskoj, Švicarskoj, Japanu, Kini i drugim zemljama, te dobitnik brojnih priznanja i nagrada za naučnoistraživački rad.

Sastanci u okviru izrade studije EUA o istraživačkim kapacitetima u zemljama Zapadnog Balkana

5. juli. 2017. – Evropska univerzitetska asocijacija (EUA) trenutno provodi istraživanje u cilju izrade studije o istraživačkim kapacitetima u zemljama Zapadnog Balkana, a u okviru SPHERE projekta koji finansira Evropska komisija (SPHERE project - Support and Promotion for Higher Education Reform Experts). Cilj studije je



prikupljanje informacija i mišljenja predstavnika visokoškolskih i istraživačkih institucija zemalja Zapadnog Balkana kako bi se razvoju istraživačkih potencijala u regionu pružila što bolja podrška.

U okviru aktivnosti prikupljanja informacija za spomenutu studiju, Univerzitet u Sarajevu je posjetila prof. dr. Melita Kovačević, redovna profesorica Sveučilišta u Zagrebu, u svojstvu EUA eksperta na projektu.

Profesorica Kovačević se na odvojenim sastancima susrela sa rektorom prof. dr. Rifatom Škrijeljom i prorektorima Univerziteta u Sarajevu; prof. dr. Izetom Rađom, prorektorom za naučnoistraživački/umjetničkoistraživački rad i akademikom dr. Dejanom Miloševićem, predsjedavajućim Savjeta za nauku i umjetnost Univerziteta; predstavnicima menadžmenta organizacionih jedinica, te nastavnima, saradnicima i doktorantima Univerziteta.

Cilj sastanaka bili su razgovori i razmjena mišljenja u vezi sa podrškom naučnoistraživačkoj djelatnosti i razvojem istraživačkih potencijala na Univerzitetu.

Održan okrugli sto *Bibliotečko-informacijske službe i usluge u visokoškolskim bibliotekama kao podrška učenju i učešću studenata s invaliditetom*

6. juli 2017. – Kao zajednička aktivnost dva CBHE projekta pod nazivom *School-to-Work Transition for Higher education students with disabilities in Serbia, Bosnia & Herzegovina and Montenegro*, te *Library Network Support Services: Modernising libraries in Western Balkan countries through staff development and reforming library services*, a koji se implementiraju na Univerzitetu u Sarajevu, održan je okrugli sto *Bibliotečko-informacijske službe i usluge u*



visokoškolskim bibliotekama kao podrška učenju i učešću studenata s invaliditetom u prostorijama Centra za interdisciplinarne studije Univerziteta u Sarajevu. Prisutnima se obratila prof. dr. Maida Čohodar-Husić, prorektorica za kvalitet Univerziteta u Sarajevu, te istakla zadovoljstvo što je Univerzitet u Sarajevu partner u realizaciji projekata koji se bave pitanjima prava i potrebama osoba sa invaliditetom.

Izlagači na okruglom stolu su bili predstavnici dvaju projekata:

- doc. dr. Lejla Hodžić (članica *Trans2Work* tima)
- mr. sc. Irena Pejić (članica *Library Network Support Services* tima)
- Merima Zukić, MA (članica *Trans2Work* tima)
- doc. dr. Lejla Hajdarpašić (koordinatorka projekta *Library Network Support Services* za Univerzitet u Sarajevu)

- prof. dr. Lejla Kafedžić (koordinatorica projekta *Trans2Work* za Univerzitet u Sarajevu)
- mr. sc. Nadina Grebović-Lendo (članica *Library Network Support Services* tima)

Okruglom stolu prisustvovali su nastavnici, studenti Univerziteta u Sarajevu te drugih univerziteta, visokoškolski bibliotekari, bibliotekari javnih te školskih biblioteka, koji su razmijenili svoja iskustva i mišljenja u pogledu unapređenja kvaliteta informacijskih usluga za korisnike sa invaliditetom.

Univerzitet u Sarajevu promovirao 71 doktora nauka

6. juli 2017. – Svečana promocija doktora nauka Univerziteta u Sarajevu upriličena je u Narodnom pozorištu Sarajevo. Na promociji su prof. dr. Rifat Škrijelj, rektor Univerziteta u Sarajevu, prorektori Univerziteta u Sarajevu i dekani fakultetâ i akademije promovirali 71 kandidata i kandidatkinju na čast doktora nauka.

Prof. dr. Rifat Škrijelj, rektor Univerziteta u Sarajevu, uz riječi dobrodošlice istakao je da je Univerzitet u Sarajevu, kao najstariji univerzitet u Bosni i Hercegovini, koji posjeduje najveći potencijal za napredak i reformu našeg društva u cjelini, od svog osnivanja do danas promovirao preko 160 hiljada diplomanata, preko 16 hiljada magistranata i sa današnjom promocijom 3140 doktora nauka.



Ovim svečanim činom promocije Univerzitet u Sarajevu postao je bogatiji za sedamdeset jednu kandidatkinju i kandidata na čast doktora nauka iz oblasti koje pripadaju grupacijama humanističkih, društvenih, medicinskih, prirodno-matematičkih i biotehničkih te tehničkih nauka kao i Grupaciji umjetnosti.

„Svjedoci smo da se svijet i naše okruženje ubrzano mijenjaju noseći sa sobom ogromne mogućnosti i rizike. Kompetencije ljudi su te koje postaju bitnije od njihovog porijekla, etničke, vjerske, rasne, spolne i socijalne pripadnosti. Zato doktori nauka kao intelektualci par excellence imaju posebnu ulogu u procesu kreiranja budućnosti, jer predstavljaju istinsku stvarnost i potrebu 21. vijeka te temelj kompetencije svake nacije i države“, naglasio je rektor Škrijelj, te istakao da stjecanje akademskoga zvanja doktora nauka predstavlja ključnu



prekretnicu na životnome putu svakoga člana akademske zajednice, budući da se ovim činom postaje samostalni istraživač, tj. stječe se pravo na samostalno oblikovanje vlastitih istraživanja.

„Ovaj vid akademske slobode sa sobom nosi posebnu odgovornost, jer valja imati na umu da je znanje uvijek uvjetovano ljudskom potrebom te nije tu nikada radi sebe samog. Ono dolazi iz zbilje i njoj se vraća kako bi utjecalo na mijenjanje stvarnosti. Zato je zadaća svake nove generacije doktoranata, pa i ove koju danas promoviramo, da svojim djelovanjem u društvo unesu promjene koje će u sebi sadržati iskru novih promjena, jer istinski intelektualci su ti koji u sebi nose vitalnu humanost koja ne podnosi dovršenost, statičnost, dogmatičnost i druge prepreke ljudskog progresa“, naveo je rektor Škrijelj, te uputio čestitke doktorima nauka na dosadašnjim uspjesima te izrazio želju da nova znanja i umijeća primijene na opću dobrobit svoje zajednice i čovječanstva u cjelini.

Stremeći ka društvu znanja, Univerzitet u Sarajevu je promovirao: 12 kandidata na čast doktora tehničkih nauka, šest kandidata na čast doktora medicinskih nauka, po pet kandidata na čast doktora geografskih nauka i doktora stomatoloških nauka, po četiri kandidata na čast doktora historijskih nauka, doktora književnohistorijskih nauka, doktora pedagoških nauka, doktora odgojnih nauka, doktora poljoprivrednih nauka i doktora veterinarskih nauka, po tri kandidata na čast doktora islamskih nauka, doktora zdravstvenih nauka i doktora lingvističkih nauka, po jednog kandidata na čast doktora političkih nauka, doktora socioloških nauka, doktora žurnalističkih nauka, doktora nauka u oblasti sporta i tjelesnog odgoja, doktora kriminalističkih nauka, doktora farmaceutskih nauka, doktora nauka u oblasti muzikologije, doktora bioloških nauka, doktora matematičkih nauka i doktora šumarskih nauka.

U ime promoviranih doktora nauka Univerziteta u Sarajevu obratio se dr. Sead Šemsović, naglasivši da je individualno sazrijevanje najprije rezultat truda i odgovornosti svakog pojedinca ponaosob, ali da će i sam društveni kontekst i raznolike životne okolnosti imati svoj udio, te će se stoga ovim ličnim napredovanjem okoristiti ne samo uspješni tragalac već i njegova okolina. Zapravo, razvijena svijest koju je kolektiv izgradio kod svoga znanstvenog predstavnika mnogostruko će se kolektivu i vratiti. „Potpun intelektualac oduvijek ima pune ruke posla, neprestano mora raditi na popravljajući sebe. Onako kako neumorno radi na popunjavanju svoje biografije i bibliografije, tako mora djelovati na građenju vlastitog humanizma. Tek mudro izbalansiran odnos ovih vanjskih i unutarnjih dimenzija učinit će znanstvenika cjelovitim“, naglasio je dr. Sead Šemsović.



Jačanje akademske saradnje između Univerziteta u Kuvajtu i Univerziteta u Sarajevu

Susret prof. dr. Yousefa S. H. Al-Zalzalaha i prof. dr. Rifata Škrijelja

7. juli 2017. – Prof. dr. Yousef S. H. Al-Zalalah, profesor Fakulteta administrativnih nauka Univerziteta u Kuvajtu i predsjednik Petrolink Holding kompanije, posjetio je Rektorat Univerziteta u Sarajevu, gdje se susreo sa rektorom prof. dr. Rifatom Škrijeljom.

Susretu su prisustvovali i direktori Međunarodnog instituta za bliskoistočne i balkanske studije (IFIMES) doc. dr. Zijad Bećirović i gospodin Bakhtyar Aljaf, te prorektori Univerziteta u Sarajevu: prof. dr. Aida Hodžić, prof. dr. Izet Rađo, prof. dr. Aleksandra Nikolić, prof. dr. Željko Šain i prof. Zijad Mehić.

U okviru prve posjete gospodina Al-Zalzalaha Univerzitetu u Sarajevu,

rektor prof. dr. Rifat Škrijelj je, uz riječi dobrodošlice uvaženom gostu, predstavio historiju i razvoj Univerziteta u Sarajevu, istakavši sveobuhvatnost Univerziteta koji pokriva oblasti humanističkih, društvenih, medicinskih, prirodno-matematičkih i biotehničkih te tehničkih nauka i umjetnosti.

U fokusu sastanka bili su razgovori o mogućnostima produbljivanja saradnje između Univerziteta u Kuvajtu i Univerziteta u Sarajevu u skladu sa Sporazumom o akademskoj saradnji potpisanim između dvije institucije. Posebno je naglašena potreba za intenziviranjem razmjene studenata i nastavnog osoblja, kao i zajedničkog učešća u međunarodnim projektima.

Gospodin Al-Zalalah je naglasio da će Ministarstvo visokog obrazovanja Kuvajta i Univerzitet u Kuvajtu obezbijediti određeni broj stipendija čime će biti olakšan studij na Univerzitetu u Kuvajtu zainteresiranim studentima Sarajevskog univerziteta.

Ocijenivši izuzetno značajnim predložene ideje za saradnju, rektor Škrijelj je istakao da će realizacija razmjene studenata i nastavnog osoblja između Univerziteta u Sarajevu i Univerziteta u Kuvajtu biti odličan temelj za planiranu privrednu saradnju između naše dvije zemlje.

Susret je završen izraženim obostranim interesom za unapređenje akademske saradnje, a u narednom periodu bit će organiziran i susret menadžmenta Univerziteta u Sarajevu i Univerziteta u Kuvajtu.



Rektoru Univerziteta u Sarajevu dodijeljena počasna titula *Ambasador znanja*

7. juli 2017. – Prof. dr. Rifatu Škrijelju, rektoru Univerziteta u Sarajevu, dodijeljena je počasna titula *Ambasador znanja* koju dodjeljuje Life Learning Academia iz Slovenije.

Počasnu titulu *Ambasador znanja* rektoru prof. dr. Rifatu Škrijelju uručila je direktorica Life Learning Academia gospođa Marjetka Kastner u Rektoratu Univerziteta u Sarajevu. Prethodno je bilo planirano da uručenje počasne titule *Ambasador znanja* bude upriličeno 31. maja 2017. godine na Akademsko-ekonomskom kongresu održanom na Brdu kod Kranja, međutim rektor Škrijelj je odgodio uručenje zbog rasprave o Zakonu o visokom obrazovanju Kantona Sarajevo.

Akademsko-ekonomski kongres je jedan od vodećih međunarodnih događaja u regionu koji jedanput godišnje okuplja pojedince i organizacije iz cijelog svijeta sa ciljem da se predstave dostignuća, potencijali ali i mentori iz oblasti znanja na globalnom nivou. Naglasak je na učenju, znanju i povezivanju.

„Mnogo mi znači jedno ovakvo priznanje od eminentne institucije kao što je Life Learning Academia, koje ujedno predstavlja i priznanje za Univerzitet u Sarajevu. Posebno je značajno što se ovim priznanjem, dodijeljenim meni kao rektoru, poboljšava i međunarodna reputacija Univerziteta u Sarajevu“, naveo je rektor prof. dr. Rifat Škrijelj te istakao da je čast nositi titulu *Ambasador znanja* koju nose i doc. dr. Zijad Bećirović, dr. Franz Fischler, Edward Charles Francis Publius de Bono, dr. Akkan Suver, prof. dr. Nikica Grbić, gospodin Zoran Živković, gospodin Milan Petrović i ostali.

Rektor Škrijelj je također istakao dosadašnju uspješnu saradnju sa univerzitetima u Sloveniji, te naglasio da današnji sastanak sa direktoricom Life Learning Academia i direktorom IFIMES-a donosi nove oblike saradnje i obogaćuje saradnju Univerziteta u Sarajevu sa institucijama u Sloveniji.

Svečanom uručanju počasne titule *Ambasador znanja* prisustvovali su i doc. dr. Zijad Bećirović, direktor Međunarodnog instituta za bliskoistočne i balkanske studije (IFIMES), i prorektori Univerziteta u Sarajevu: prof. dr. Aida Hodžić, prof. dr. Izet Rađo, prof. dr. Željko Šain, prof. Zijad Mehić, prof. dr. Maida Čohodar-Husić i student-prorektor gospodin Mirza Ibrahimović.

